

# Geneses

Kun yali kamin ya gaba ya yobal yalabal ya  
talkan kinagere elyowa i kam dimue.

## Gilme 1

- 1 Kamin kware koma one Kun kamin ya gaba elyomue. Elyowa kagene i are kagene de namba 1 kale kole elmue./ Kun kamin ya gaba elyomba gaba yuu dire talkan ta gabal dikemue. Nil ore gabal mowa bolemil i kamin ore sibongoro Kun Sugugilamie nil ore mowal bolemil i pire-ure elmue./ Ena Kun ka el dimue, "Nabaluwa unogel namue!" Kun el dungoro nabaluwa unogel pumue./ Nabaluwa unogel pungoro Kun nabaluwa min kanere sibowal suna sibontere "Giruwa kole do! Taguwa kole do!" dimue. Kun el dungoro giruwa kole dimue. Taguwa kole dimue./ Nabaluwa kagene unogel puwa i Kun i kam taguwa yomue. Sibowal i Kun i kam giruwa yomue. Kun koginan elmolipungoro kamin gidnale engoro are kagené de namba 1 bawa dimue./
- 2 Ena Kun ka el dimue, "Kawalil ta unogel pire nil suna sibontenamue!" Kun el dungoro kawalil unogel pire nil suna sibontomue./ Kun yali nil suna sibontere "Nil tau maunil ago!" dire "Nil tau kawalil molo!" dimue. Kun el dungoro nil tau maunil agemue. Nil tau kawalil monmue./ Nil kawalil mowa i Kun i kam kamin-agai yomue. Kun koginan elmolipungoro kamin gidnale engoro are kagene de namba 2 bawa dimue./
- 3 Ena Kun ka el dimue, "Nil maunil agowa kure bol bage ta molo! Gaba kula

- duwa bage ta unogel namue!" Kun el dungoro nil maunil agowa i bage ta kure bolmue. Gaba kula duwa bage ta unogel pumue./ Gaba kula duwa unogel puwa i Kun i kam gaba yomue. Nil bage ta kure bolmowa i Kun i kam pilnil yomue. Kun talkan elyowa i min kanemue./ Ena Kun ka el dimue, "Komina kane kane ya kwilkan kane kane ya ere kane kane gabal unogel nangoro komina ibem nene nene kolere, kwilkan nene nene ibem kolere ere nene nene mugem kolamue." Kun el dungoro komina kane kane ya kwilkan kane kane ya ere kane kane, gabal unogel pire Kun duwa mele el elmue./ Gabal i komina kane kane ya kwilkan kane kane ya ere kane kane i kinagere nene nene mugem kowa i gabal unogel pumue. Kun talkan elyowa i min kanemue./ Kun koginan elmolipungoro kamin gidnale engoro are kagene de namba 3 bawa dimue./
- Ena Kun ka el dimue, "Nabaluwa tau kaminil unogel namue! Nabaluwa tau unogel nawa i giruwa ya taguwa ibe sire ba kagene ibe sire are dowu kagene ya nim suwu kagene ibe sire na koginan nima puwa elga i ama yobal omine ditenamue.\*/ Nabaluwa tau kaminil unogel nawa i nabale gabal denangoro gabalil nabalamue." Kun el dungoro nabaluwa tau kaminil unogel pire Kun duwa mele el elmue./ Kun nabaluwa ore suwo elyowa i are ya ba elyomue. Kun yali taguwa kagene are i ore dename dipile are elyomue. Giruwa kagene ba yuwalta dename dipile ba elyomue. Kun yali kwile

\*Arom 1:20, Aposel 2:19-20.

- 17 kowa ama elyomue./ Ena Kun yali are-ba-kwile nabale gabal denangoro gabalil nabalamae dipile Kun yali are-ba-kwile
- 18 kaminil yepagelemue./ Kun yali are-ba-kwile kaminil yepageluwa i giruwa ya taguwa ibe sire are i taguwa kagene dename dipile ba i giruwa kagene dename dipilmue. Kun talkan elyowa i min kanemue./ Kun koginan elmolipungoro kamin gidnale engoro are kagene de namba 4 bawa dimue./
- 20 Ena Kun ka el dimue, "Nilkabe kane kane nilil magele sirere dire yabesire molamue! Kabekawa kane kane ere minemil mole kaminil
- 21 pirere diwanamue!"/ Kun ka el dire nilkabe ore gwibile tau elyere mal nilil domue. Nilkabe kebil kane kane ama elyere mal nilil dowu magele sirere dire yabesire pumue. Kabekawa yau yau pewa i kane kane ama elyomue. Ena nilkabe ya kabekawa kinagere yalemai nene nene mamenem ele magele sirere dire yabesire pumue. Kun
- 22 talkan elyowa i min kanemue./ Ena Kun nilkabe kane kane ya kabekawa kane kane akele ditere ka min el ditomue, "Nilkabe kane kane! En magele sirere dire nilil kinagere mol kune elo! Kabekawa kane kane! En magele sirere dire ere minemil kinagere
- 23 mol kune elo!"/ Kun koginan elmolipungoro kamin gidnale engoro are kagene de namba 5 bawa dimue./
- 24 Ena Kun ka el dimue, "Bona kane kane ya duakabe kane kane ya guretogi kane kane gabal unogel pire nene nene mamenem ele magele sirere dinamue." Kun el dungoro yalemai gabal unogel pire Kun duwa mele el elmue./ Kun yali bona kane kane ya duakabe kane kane ya guretogi kane kane elyowa yalemai kinagere nene nene mamenem

ele magele sirere dire gabal ore magelemue.  
Kun talkan elyowa i min kanemue./

- 26 Ena Kun ka el dimue, "Nono yobal ta no molbinga mele elyenabinue. Yalemai no elbinga mele elamue. Yobal yalemai nilkabe nilil mowa ya kabekawa ere minemil mowa ya bona kane kane ya guretogi kane kane kinagere gabal wanuwa i ore eltere gaba  
27 kinagere ama kemelamue."/ Ena Kun yali yobal elyowa i Kun nene mowa mele elyomue.  
Kun yali yobal elyowa i yal ya abal  
28 elyomue./ Kun yal ya abal elyemaldere yal sule akele ditere i ka min el ditomue, "En gage kul yenanue! En gage kul yenanga yalemai magele sirere dire gaba kole kole mol kune elere gaba kinagere kemelamue.  
Nilkabe nilil mowa ya kabekawa ere minemil mowa ya talkan kinagere yuu kwi mole gabal  
29 wan uwa i ama ore eltenamue."/ Ena Kun yali yobal ka el ditomue, "Komina ibe kane kane ya ere muge kane kane gabal kole kole mogonawa i na elyere en tega en ninanga dimue./ Bona kane kane gabal mowa ya kabekawa kane kane ere minemil mowa ya guretogi kane kane ya talkan kinagere gabal yuu kwi mowa i ama na komina kane kane elyega ninamue." Kun el dungoro yalemai  
31 kinagere Kun duwa mele el elmue./ Ena Kun kanuwa talkan kinagere elyowa i kanere "I min one dime" dire talkan kinagere elyowa i min one kanemue. Kun koginan elmolipungoro kamin gidnale engoro are kagene de namba 6 bawa dimue./

## Gilme 2

- 1 Kun yali koginan elmolipire kamin ya gabal elyemaldere talkan kinagere kaminil ya gabal mowa i ama elyemaldomue./ Kun are

kagene 6 pela koginan elmolipire talkan kinagere elyemaldere koginan kinagere ewa i elbawa dire are kagene namba 7 molpilmue./  
3 Kun yali talkan kinagere elyemaldere koginan kinagere ewa i elbawa dire are kagene namba 7 molpuwa i pile Kun are kagene namba 7 min pilttere "I are kagene ta nabaluwa diname" dimue./  
4 Ka enma kele kanenga i kamin kware koma one kagene Kun ore ewa yali kamin ya gabal elyowa kam dimue./ Kun ore ewa kamin ya gabal elyowa kagene i Kun nim ole deime dekewa yate yal ta komina elyalawa ta ama ole molkewa i pile komina tau gaba ole  
5 mogekemue./ Kagene i nim ole sikemba mogemanile gabal kinagere mol kune elmue./  
6 7 Ena Kun ore ewa yali gaba tau ire nure agedage sire yal ta elyere yobal yuu kwi mowa-gilamie kuu si gumamil dongoro yali agelere yuu kwi monmue./

Ere ibelil ta kam Iden i kam dimue.

- 8 Kun ore ewa yali are mogeuwal ile ere ibe ta elyalmue. Kun ere ibe elyawa i kam Iden yere yal elyowa era agelipuu ere  
9 ibelil domue."\*/ Kun yali ere ibelil elyawa i ere milege yobal min one kanuwa mogere muge min one kane kane kolmue. Kowa i nowa dogen ore kemue. Ena ere ibelil suna i ere ta muge kowa i yobal ninawa kage kage yuu kwi mole molamue. Golkenamue. Ere ibelil suna i ere ta ama muge kowa i yobal ninawa mamene min dimia

---

\*\*"Iden" i Ibiru ka ta mamenem el pamue:  
Agai min one dimue.

pilkun dalere mamene nige dowwa ama  
pilkun dalamue./

- 10 Ere ibelil suna i nil nela ta agemue.  
Agere biya dire ere ibelil suna kole kole  
pungoro ere ibe min mogemue. Nil nela era  
sibontere u swire swire pire agemue./
- 11 Nil nela era sibontowa kole ta puwa i kam  
Paisan dimue. Nil nela Paisan i agai ta  
kam Awila i suna domue. Awila agai i  
yobal gut moni wouwa agai dimue./
- 12 Awila agai i yobal gut moni wouwa i gut moni  
min one dimue. Awila agai ere tau duwa i  
nilem demine min suwa i kam Deliam yowa i  
ama dimue. Mai kobile gol ta kam Onikis
- 13 i ama milege dimue./ Nil nela era  
sibontowa kole ta puwa i kam Gian dimue.
- 14 Nil nela Gian i agai ta kam Itiopia i suna  
domue./ Nil nela era sibontowa kole ta ama  
puwa i kam Taigiris i dimue. Nil nela  
Taigiris i Asiria agai are mogeuwal agemue.  
Nil nela era kole ta ama puwa i kam  
Yupiretis dimue./
- 15 Ena Kun ore ewa yali yal elyowa  
agelipuu ere ibelil Iden suna dowwa i  
koginan ele ere ibe kemele molame dipile
- 16 domue./ Kun ore ewa yali yal elyowa era  
ka dinima pire el ditomue, "En ere ibelil  
mole ere mugem kinagere ninanga pamue./
- 17 Dimba ere ibelil suna ere ta muge kowa  
yobal ninawa mamene min dimia pilkun dalere  
mamene nige dowwa ama pilkun dalawa i mane  
ore dimue. En nekenanue. Ninanga en pola  
golanga pamue."/
- 18 Ena Kun ore ewa yali el dimue, "Na yal  
elyega yali nene teran molawa paikemue.  
Na yali kunam ta elyegere eli kene mole
- 19 akele ditenamue."/ Ena Kun ore ewa yali  
gaba ta ire nure agedage sire bona kane

- 20 kane ya kabekawa kane kane elyere ageli  
 yal Adam mowal pire "Kam silawe diyename"  
 dire yal mowal domue. Ena yal Adam  
 talkan kinagere gabal yuu kwi mowa i kam  
 teran teran yetowa i enmagia yuu dimue./  
 20 Yal era bona kane kane ya kabekawa kane  
 kane kam teran teran kinagere  
 yetomba kunam ta eli kene mole akele  
 ditenawa ta molkemue./
- 21 Ena Kun ore ewa yali yal Adam ul ore  
 ka ditongoro pai mongoro Kun dagelem ta  
 22 age pol di-dire mie age sigii ditomue./ Kun  
 yal era dagelem ta age pol dimena dowa  
 era ire abal ta elyere agelipuu yal mowal  
 23 koltomue./ Ena yal Adam el dimue, "Kun na  
 yobilagena ya na miina ire abal elyowa  
 i pile na 'abal' kam yeteyue," yal era ka  
 24 el dimue./ Kun yali yal ya abal elyowa\*  
 i pile yalkane nemam maldere ebiembai kene  
 sidaulangoro yal sule i u gam teran dal  
 namue./
- 25 Kagene i yal ya ebiembai yal sule i gal  
 kugel pilkere yorowame monmba min mole  
 gai golkemue./

## Gilme 3

Yal ya abal tal nige dowa ewa kam dimue.

- 1 Kun ore ewa yali duakabe kane kane  
 elyomba duakabe ta nomane ore pawa pilbawa  
 duwa yale mowa i togi monmue. El pawa i  
 pile togi ure abal sile bolpilmue, "Kun

---

\*Matiu 19:4

- 2 yali en yal sule ere ibelil ere kinagere  
 mugem nekeo dientomo?"/\* Ena abal togi  
 el ditomue, "No yal sule ere muge ere  
 3 ibelil kinagere ninabinga pamue./ Dimba  
 ere ta ere ibelil suna duwa i Kun i mane  
 dinotere 'En yal sule ere muge i ninanga  
 mo aupilanga en yal sule pola golanue'  
 4 dinotomue."/ Dimba togi era abal el  
 ditomue, "Taman. En ninanga ta one  
 5 golkenanue./ En ere muge era ninanga  
 kagene i en yal sule nomane ore painamue.  
 En nomane ore pangoro en mamene min dimia  
 ya mamene nige dowa dimia ama pilkun dalere  
 Kun nene mowa mele en ama unogel nanue.  
 6 Kun i pile mane dientomue."/ Ena abal era  
 ere muge i nowa-muge min one kanere muge  
 i min one duwa kan dogen golere el  
 dipilmue, "Na ere mugem i ninalga na  
 nomane ore painame" dipilere mugem tau  
 pelnomue. Pelnere mugem tau wiembai  
 7 tongoro yali ama nomue./ Abal mugem  
 nongoro yal ama mugem nongoro yal sule i  
 ege teran nomane ore pangoro kan ileya dowa  
 yal sule i yorowame molbilga kanemue.  
 Kanere gai ore golere yal sule i aukola  
 anem balere kan direman dere gorai ya  
 kawul dal pilbilue./
- 8 Ena pudungoro Kun ore ewa yali ere  
 ibelil wan uwa Adam ya ebiembai nuge duwa  
 pilere Kun gumamil molale dipilkere tii  
 9 pire ere ibelil suna kul sipamue./ Dimba  
 Kun ore ewa yal Adam alem bole "En ai  
 mone?" dimue./ Ena yal era ka di kole dere  
 Kun el ditomue, "Na en unga pile, na  
 yorowame molga, na kuril pile ere ibelil

---

\*2 Korindi 11:3

- 11 suna kul sipaiyue."/ Ena Kun yal era sile bolpilmue,"Ala dientongoro en yorowame mole dipilne? Na ere muge mane dientega era en nemaldeno?"/ Ena yal era Kun el ditomue, "En abal na eli kene molame dire abal na tenga abali ere muge pelnere na towa neyue."/ Ena Kun ore ewa abal era el ditomue, "En sila elne?" Abal di kole domue, "Togi ta ka kule sinatongoro na ere muge pelneyue."/

Kun yali togi ya yalabal giwil puwa towa kam dimue.

- 14 Ena Kun ore ewa yali togi el ditomue, "En tal nige dow a inogel denga en giwil puwa talem inanue. En giwil puwa talem inanga i wibe pire duakabe tau biem mowa ya tau biem molkewa i kinagere giwil puwa talem age ime denamue. En miriyen bilere gabal wan molere yuu kwi molanga kagene i en kogane kage kage newan molanue./ En ya abal era kiam kiam ele wan molipire en gaun gagelema ya abal gaum gagelema ama kiam kiam elmolamue. Eme abal era gaum gagelem ta yali en bilen egele dal dinangoro en yali kalem biine kuu gare balanue."/ Ena Kun togi ka el ditemaldere abal era ka el ditomue, "En gage painanga kagene i na giwil ore puwa en tegere en giwil ore pile gage kul yenanue. En gage kul yere giwil ore pilanba en nima pire wienbai inale dipilanue. En wienbai wibe pire ore elentenamue?/ Ena Kun yali Adam ka el ditomue, "En ebienbai ka duwa pile dule bole ere muge mane dientega nenga, gaba min en tega i enma u nige domue. En mam paire gaba u nige dow a i pile en yuu

- 18 kwi monga kagene en kage kage koginan ore ele kwa kominan yalninanue./ En mam paire tal galeyawa ya kwime kaime gabal mogenamue. El pawa ipile en tal ire kwa komina yalninanue./ En palan ore bole koginan niga diele kwa kominan yalninanue. El elmolipire golanga yobal en gan ipuu maul sinawa kagene i en gan u gaba kwi namue. Na gaba ire en elyega, i pile en golanga en gan u gaba kwi namue."/
- 19 Abal era gage kul yenawa ainere ainere yobal kinagere yuu kwi molunawa, ipile yal Adam yali ebiembai kam Ewa yetomue.\*/ Ena Kun ore ewa yali bona sip sip ta sigole gam kwil sire gal elyere Adam ya ebiembai tongoro yal sole i gal domue./

Kun yali Adam ya Ewa ere ibelil abile mena dow a kam dimue.

- 22 Ena Kun ore ewa yali el dimue, "No yal elyobinga yali mamene min dimia ya mamene nige dow a dimia pola pilkun dalere no molbinga mele unogel pumue. El pawa ipile yali ere ibe ta mugem kowa yobal ninawa yalemai kage kage yuu kwi mole molawa mugem i yal era ninawa pamue. Ninawa yali kage kage yuu kwi mole golkenawa pamue./ Ena Kun ore ewa el dire yal Adam ya ebiembai ere ibelil Iden abile mena domue. Abile mena dere

---

\*"Ewa" kam duwa i Ibiru ka mamenem el pamue: "Yuu kwi monmuae."

el ditomue: "En ere mena pire na koma gaba  
ire elyeentegal i en kwa komina elyalninana  
24 po!"/ Kun el dire yalabal abile mena dere,  
Kun yali angelo nima puwa tau ageli yure  
ere ibelil Iden are mogeuwal ile  
dongoro nu paimonmuae. Kun yali kubapilage  
ore gwibile ta dowá ore dowá i ama ire ere  
ibelil suna yongoro kubapilage era wenabe  
gelere ere ibelil yobal igal nawa milem  
sipele domue. Ere ibe ta muge kowa i  
yobal nere kage kage yuu kwi molawal  
molawa-muge i Kun yalabal nekename dipile  
mile sipele domue./

Copyright Reserved

New Tribes Mission, Kundiawa, Papua New Guinea  
Printed by: Christian Communications Limited  
P.O. Box 95364, Tsimshatsui, Hong Kong.  
CCL/JP 1/80 7H5